

QUESTIO MEDICA.

Quodlibetariis disputationibus manè discutienda in Scholis
Medicorum die Jovis 11. Decembris.

NICOLAO RAINSSANT, Doctore
Medico, Præfide.

An Sterilitati, Aquæ Nitro-ferratæ potus?

I.

PRÆCIPITI fato cadunt mortalia, felici casu reparantur eadem, suâque in sobole quodammodò reviviscunt, perennis juxtâ ac providentis Naturæ beneficio. Hinc innata generandi libido, quam bruta certis persentiunt temporibus, vere maximè, cum vena novo turget sanguine: Solus homo omni tempore blandiori conjugis delectatur consortio (hæc Venus mutua finxit solatia) non semper tamen sequitur gratæ voluptatis expectata merces. Sterilis enim ut arbor floribus amœnis & pulchrâ subridens fronde vacuum non rarò delusit colonum: itâ sapiculè contigit, fugacem frigente sinu venerem oculuisse: fecundamque credideris maritam, cujus exta larvato immutata morbo generis spem adimunt, quæ subindè tamen redit aliquandò, externâque revocatur ope, seu conceptûs impedimenta removeris, seu requisitam habitudinem conciliaveris. Vis ergò præclusa sterilitate viscera ad conceptum relaxari, sopitum exfuscita uteri fermentum, arctiores fibras emolliendo relaxa, laxiores constringe; putris humoris tetram illuviem expurga; si plus æquo ferveat uterus, temperandus ardor, si frigescat, accersendus calor. Denique vel menses sine lege fluentes sistendo, vel accelerando lentiores, conceptum utique adjuvabis.

II.

HOMINIS primordia qui repetit ab Ovo, joci magis est quam veritatis amans: nempe lepida foret ejusmodi incubatio: apage ergò muliebrium Ovorum scrutatores: seriùs expendendum, quæ nostra sit origo, & quam mira efficiat seminis utriusque permixti vivida vis. Liquor ille niveus ab arteriosi sanguinis sulphurea maximè salsuginosâque parte deciduus, ubi ad testes usque per mille meandros facilem sibi viam fecit, loci impatiens petulanti erumpit saltu, atque inter jucunda naturæ vireta refunditur. Nec putres, quæ quorundam observatio fuit, non alioqui diligentissima, semen intra membranarum interiorum poros absorberi, aut foras

idem sensum diffluere. Non prius enim in uteri cavitatem fibrarum ope undequaque contracti exceptum est, quam spiritus ejusdem vivificus blando calore fatus, uterino etiam adjutus fermento nec depresso nimis nec nimis elato, primam corporis fabricam aggreditur. Tum verò cerneret, ut particulæ seminis virilis tenuiores, absque sanguinis menstrui concursu muliebris seminis minimos subeant poros, quarum aliæ subtiliores putæ, penitus concentrantur exiguæque comprehenduntur bullâ, quæ totius est formationis rudimentum; aliæ paulo quidem crassiores circumfusæ, exteriores efformant membranas. Illo sanè apparatu nihil mirabilius, at nihil arduum magis ut vel à re minima impediatur opus. Sit licet hymenæo aptum seminum, impuris tamen commistum uteri succis corruptetur facile: obruetur nimio sanguinis affluxu: præfervidiori æstu torrebitur, vitio tandem fibrarum vel ostii constrictione ipsi denegabitur aditus, vel oris lubrici laxitate nimia mox eliminabitur.

I I I.

SOLE & homine homo, sole & sale generantur mineralia. Atque ut idem uterus muliebris, sexu, temperamento, magnitudine, figurâ diversos alit paritque homines, sic terræ penetralibus (mineralium metallorumque utero) abstrusa latent argentum, ferrum, nitrum atque alia hujuscemodi: quæ quidem speciei diversæ ac naturæ sunt ex mutuo varioque salis omnigeni, aliorumque principiorum congressu, præter certum in terræ viscera solis influxum, quem primariam agnoscunt sui causam. A tali mineralium discrepantia, quæ iis in locis emicant aquæ, varias trahunt vires, variæque sortiuntur nomina: aliis enim terra præstat quidquid valent, vim suam depromunt quædam à succis congelatis, illæ metallis, hæ mineralibus, simul & metallis debent quidquid virtutis habent. Earum omnium unaquæque dotes eximias obtinet, à nonnullis equidem parvi faciendas, vel quòd ipsas ignorent, vel quòd parandæ difficultate non sint pretiosum medicamentum, aut hominum opinionione carum; harum tamen Lympharum, Nitro-ferratarum maxime jam passim scaturientium usus magno fuit plerisque commodo. Testes sunt Nitro-sulphuræ Borbonenses aquæ, testes Nitro-ferratæ sed vitrioli participes Spadenses fontes quatuor, testes itidem Nitro-ferratæ Dinannenses Aremoricæ, quarum omnium quotidiana in sanando prodigia, ad veterum aquarum prope accedunt. Ecquis vero affectus his in aquis suam non inveniat medicinam? Illuc eant fœminæ quibus Lucina noverca prolem negavit, ibi sanè vindicabuntur à *στεινωσι* apud antiquos adeò probrosâ, ut sæpius an-

3

cillam concederet nupta marito: ibi earum viscera prudentis consideratique medici arbitriò ritè apparata expediuntur infatigabiles, uteri colluvies expurgabitur, non fluentes menses, quorum periodicus motus, non à Lunæ imperio, minùs à Plethorâ, quasi postliminiò revocabuntur, cæteraque conceptui minùs benè accommodata ritè componentur.

I V.

AQUARUM mineralium vires qui à formâ quâdam substantiali deducit, is à veritate aberrat magis, quam qui principiorum combinationi, motui, figuræ easdem ascribit: quâ proinde incidendi, aperiendique virtute ferrum ac nitrum pollent, eam sui falis aculeis debent. Hujus porrò compages tota ex spiritibus acidis terræ sales penetrantibus, illiùs ex falis vitriolici, sulphuris, terræque imperfectâ unione constat: at verò, ut aquæ vim suam cathartica impertiunt medicamenta, quæ quidem nec electione, nec substantiæ similitudine, sed irritatione prava è corpore succos educunt, sic quam sibi vendicant agendi virtutem ferrum & nitrum, eandem aquæ in quâ sal eorum fusum est, ultrò elargiuntur, quâ præcipuâ dote cæteris aquarum simplicium longè antecellunt, earum licet alveus arenosus ad orientem placidè decurrat, aut ipsæ procelloso Cælo & tonante Jove pluant: Hæ nempe, etsi humectent, vasa difficillimè aut lento pede subeunt, nec valent quicquam protrudere è corpore, quin immò si liberaliùs epotentur, ventrem intumorem attollunt, visceraque vix superandis obstructionibus coangustant. At non satis laudandæ, si in transcurso ferri mineram aut nitrum lingant, quorum falis, in aquâ spontè fusilis, opè, tanta earum est in permeando celeritas ac virtus, ut & vix epotæ statim ferè mingantur & brevissimâ morâ omnes corporis partes pervadendo suis liberent impedimentis. Itâ etiam fiet, ut arescens uterus temperetur, sopiti excitentur ignes, tarda ciantur catamenia, & sordes in angustia uteri stagnantes certis in posterum temporibus excernantur. Nam salibus illis fermenti æmulis occlusa referantur vasa, densaque rarefit moles. Quid multa? Hinc purior circuiturus sanguis faciem colore eleganti suffundet, oculos vividiori accendet lumine, tutumque liberabit corpus ab innumeris quæ extincta pœnè fecunditas infert symptomatis, ipsam demùm anhelosam animam pristinâ serenitate recreabit.

V.

AQUIS nitro imprægnatis virtutem præ cæteris inesse fecundam adeo certum est ut hæc maximè de causâ aqua Nilotica fertili exuberans nitro potantium mulierum viscera ab infelici li-

beret sterilitate, & viridem Ægyptum falsâ fecundet arenâ. Hâc pariter dote prædita nix, quibus aliquantulum subsidit terris, beneficit. Quid autem aliud nitrum, quam sal, à quo vis ipsius tota? & verò à sale principiorum compactissimo naturæ effectus fermè quavis reconditissimi, fertilitas imprimis, dependent. Nonnè etenim qui mari adjacent agri, præ reliquis uberiori grataque luxuriant segete? Nonne Elisæus jericonis fontem sale fecundavit? cur ergo Nitro-ferrata aquæ hâcce carebunt prærogativâ, cum yis earum tota à Nitri-ferrique sale, quò facillimè imprægnantur: quod quidem sal sive humorem expurget noxium, sive laudabilem necessariumque nimium fluentem arceat succum, non minori tamen fecundandi virtute gaudebit. Non unica quippè, imò plures ac sapius oppositæ sunt sterilitatis causæ, quas, ullâ vix exceptâ, sal tollit variâ videlicet agendi ratione: ad hoc intelligas non esse sal naturæ ubique homogeneæ, quin esse sapius à se ipso dispar tùm motu, tùm figurâ, in quibus summa ejus differentia. Aliquandò etenim materia ipsa quam subit figuram ipsius immutat, aliquandò etiam motum inturbat rei alterius permixtio. Ne mireris ergò, si modò concitatiùs refrænent, seignius pigriùsque modò excitent sanguinis menstrui effluvium Lymphæ Minerales, si aliàs aridam partem blando perfundant rore, præhumidiorem aliàs exsiccent firmentque; diversæ quippè partium dispositionis ratione, diversi quin & oppositi eduntur effectus. Tutiùs igitur rem suam gerent mulieres infecundæ, si repurgato ritèque apparato corpore has aquas epotaverint, quarum efficacitate singulari uteri intemperies delebitur, partes generationi inservientes suis liberabuntur obstructionibus, & ipsæ post celebratum cum succi pleno marito hymæneum, illinc sinu gravido mirè recreatæ recedent.

Ergo Sterilitati Aquæ Nitro-ferratæ potus.

Domini Doctores disputaturi.

M. Mathæus Thuillier.

M. Antonius le Moine.

M. Ioan. Armandus de Massu-
vilain.

M. Ioannes-Baptista Ferrand.

M. Gujdo-Crescentius Fagen,
Francorum Regina Medi-
cus primarius.

M. Bertinus Dieuxcorge.

M. Carolus Marteau.

M. Iacobus de Bourges.

M. Stephanus Bachot.

Asserebat Parisiis RODOLPHUS OREN, Dinnannensis
Aremoricus, Baccalaureus Medicus. A. R. S. H. 1681.

Apud Franciscum Muguet, Regis & Facultatis Medicinæ Typographum.